

四庫全書

史部

欽定四庫全書

史部

關中勝蹟圖志卷七

八七

詳校官太僕寺少卿臣李廷欽

編修臣程嘉謨覆勘

總校官進士臣朱鈐

校對官助教臣胡予襄

謄錄監生臣韓鉉

欽定四庫全書

關中勝蹟圖志卷七

陝西巡撫臣畢沅撰

古蹟

祠宇

西安府隋大崇仁寺長安縣志在城西五里隋高祖子  
秦孝王施宅建為濟渡寺唐高宗徙於安業坊而以其  
處為靈寶寺盡度太宗嬪御為尼以處之復徙隣之道  
德寺於休祥坊至儀鳳二年二處併為崇聖寺輦下歲

時記唐進士櫻桃宴在崇聖寺佛牙閣即此也明天順八年秦藩創修治地得古白玉佛像及鐘磬碑刻之屬成化十二年畢工額曰大崇仁寺

臣謹按寺在長安縣之勝金舖俗呼為勝金寺秦藩長史趙德輝碑記謂寺在西補長安之金氣也天順間寺東光彩浮騰掘地得藥師佛玉像築臺作殿以祀乾隆乙未臣加修建鼎新焉

興善寺咸寧縣志在永寧門外五里初名遵善寺隋開

皇間額曰大興善寺詔僧徒二十餘萬實之招提之盛  
甲於海內唐元和四年建修轉輪藏經閣太和二年得  
梵相觀音移大內天王閣於寺中作大士閣唐末獨二

閣存焉宋淳熙間崇辨禪師居閣夜深有老狐聽經明

永樂時葺

唐鄭谷題興善寺詩寺在帝城陰清虛勝二  
林蘇侵隋畫暗茶助越甌深巢鶴和鐘喚詩

僧倚錫吟烟莎後池水前跡香難尋自注十才子詩  
集多有興善寺後池之作今寺在池無每用追嘆

寶慶寺通志在城南安仁坊一名花塔寺隋仁壽初建  
隋文帝唐中宗嘗臨幸焉文宗感蛤蜊觀音像建塔明

景泰二年修

慈恩寺通志在城南十里曲江池北本隋無漏寺內有浮圖六級舊稱鴈塔宋張禮城南遊記唐貞觀二十一年高宗在春宮為文德皇后立永徽三年沙門元奘起塔初惟五層磚表土心效西域窣堵波長安中摧倒天后及王公施錢重建至十層云鴈塔者天竺記達觀國有迦葉佛伽藍穿石山作塔五層最下一層作鴈形謂之鴈塔蓋此意也兵餘止存七層長興中西京留守安

重霸再修之長安士庶每歲春秋遊者道路相屬熙寧  
中富民康生遺火經宵不滅而遊人自此衰矣張舜民  
畫墁錄慈恩與含元殿相直續文獻通考基四面各一  
百四十尺倣西域制度有五級并象輪露盤高一百八  
十尺層層中心皆葬舍利不啻萬顆上層以石爲室立  
碑載二聖所製三藏聖教序記乃褚遂良書李楷鴈塔  
記景龍三年中宗幸慈恩寺登浮圖時在重陽羣臣上  
菊花酒上賦詩學士及詞臣並和聖製上官婕妤以宋

之問詩爲美即其事也李肇國史補唐進士旣捷題名

于慈恩寺塔故謂之鴈塔題名明天順間秦藩修唐儲光羲

同諸公登慈恩寺塔詩金祠起真宇直上青雲垂地靜  
我亦閒登之秋清時蒼蕪宜春苑片碧昆明池誰道天  
漢高逍遙方在茲虛形賓太極攜手行翠微雷雨傍杳  
冥鬼神中踐踞靈變在倏忽莫能窮天涯冠上閣闔開  
廡下鴻雁飛宮室低邈迤羣山小參差俯仰宇宙空庶  
隨了義歸前劣非大廡久居亦以危岑參雪後與羣公  
過慈恩寺詩乘興忽相招僧房暮與朝雪融雙樹濕紗  
閣一燈燒竹外山低塔藤間院隔橋歸家如欲嬾俗慮  
向來消又登慈恩寺浮圖詩塔勢如湧出孤高聳天宮  
登臨出世界磴道盤虛空突兀壓神州崢嶸如鬼工四  
角礙白日七層摩蒼穹下窺指高鳥俯聽聞驚風連山  
若波濤奔湊似朝東青槐夾馳道宮館何玲瓏秋色從



西來蒼然滿關中五陵北原上萬古青濛濛淨理了可  
悟勝因夙所宗擔將挂冠去覺道資無窮杜甫同諸公  
登慈恩寺塔詩高標跨蒼穹烈風無時休自非曠士懷  
登茲翻百憂方知象教力足可追冥搜仰穿龍蛇窟始  
出技撐幽七星在北戶河漢聲西流羲和鞭白日少昊  
行清秋泰山忽破碎湮渭不可求俯視但一氣焉能辨  
皇州回首叫虞舜蒼梧雲正愁惜哉瑤池飲日宴崑崙  
邱黃鵠去不息哀鳴何所投君看隨陽鴈各有稻梁謀  
李頻秋宿慈恩寺遂上人院詩滿閣終南色清宵獨倚  
欄風高斜漢動葉下曲江寒帝里求名老空門見性難  
吾師無一事不似在長安盧宗回登長安慈恩寺塔詩  
東方曉日上翔鸞西轉蒼龍拂露盤渭水寒光搖藻井  
玉峯晴色墮朱闌九重宮闕參差見百二山河表裏觀  
暫輟去蓬悲不定一凭金界望長安章八元題慈恩寺  
塔詩十層突兀在虛空四十門開面面風却怪鳥飛平  
地上自驚人語半天中回梯暗踏如穿洞絕頂初攀似

出籠落日鳳城佳氣  
合滿城春樹雨濛濛

薦福寺通志在永寧門外西南三里隋煬帝在藩舊宅  
唐天授元年改爲薦福寺神龍以後翻譯佛經並在此  
寺東有放生池相傳即漢鴻澤陂也歷代名畫記天后  
飛白書額淨土院門外兩邊吳道子畫鬼神南邊神頭  
上龍爲妙謹按諸畫  
今無存咸寧縣志武后始立爲大獻福寺  
度僧二百餘天授初改薦福中宗即位大加營飾寺基  
周一頃五十畝有浮圖十五級高三百餘尺景龍中宮

人率錢所立者也俗呼爲小鴈塔歷宋元明繼修

本朝康熙間修塔寺有鐘出自武功河畔砧婦坐石擣衣  
忽聲自石出響聞數里土人發之乃巨鐘也送歸寺內  
溫國寺通志在城南四十里湏水岸本隋薛國公長孫  
覽妻鄭氏捨宅置名實際寺唐開元十五年大德進法  
師立爲道場建塔改名

大定寺一統志在鄆縣東南雲際山一名雲際寺通志  
昔魏武之始有李順興者隱居此地誦金剛經聚壘瓦

塔以記經數至隋大業中乃以此地賜駙馬尉遲安爲  
柴莊安嘗見一老人謂曰此古寺地何不再葺之安遂  
置寺因掘地得石像焉長安志隋仁壽元年爲居賢捧  
日寺宋太平興國三年改今名縣志金大定再葺

惠果寺涇陽縣志在縣治西北本隋中興禪寺唐爲大  
壺寺宋改惠果寺

老子祠通志在藍屋縣東南三十里樓觀南老子於此  
說道德五千言授尹喜有說經臺又曰昇天臺長安志

華陽子錄記秦始皇好神仙於尹喜先生樓南立老子

廟晉元康五年修葺木萬株南北連亘七里給戶三百

供洒掃隋開皇元年即故址重建通鑑高祖武德七年

十月丙子幸樓觀謁老子祠

宋蘇軾說經臺詩劍舞有神通草聖海山無事化琴

工此臺一覽秦川小  
不待傳經意已空

唐周文武成康祠通志在咸陽縣治北街冊府元龜憲

宗元和十四年正月詔以周文王武王祠宇在咸陽縣

俾有司精加修飾縣志明嘉靖十年重建合祀四王

后土廟通志在三原縣東北四十里唐村縣志本名太寧宮唐時勅建宋慶厯四年修時誠心所感致有祥雲垂覆於地慶厯至金泰和初修葺者四明嘉靖年地震圮隆慶崇禎間繼修享賽稱勝焉

翠微寺通志在長安縣城西南翠微山上宋張禮城南遊記本唐太和宮武德八年建貞觀十年廢二十年太宗厭禁內煩熱命將作大匠閻立本再葺改爲翠微宮元和元年廢爲寺

金趙秉文翠微寺詩南山常愛退之詩未說雲烟潤色之要看山光如潑

黛更須留待雨晴時南山深鎖翠微宮寺在南山十里東祇怪朝來衫袖濕不知身在翠微中

報恩寺長安志在縣治南唐中宗時爲懿德太子資福遂名懿德寺後惟趾存元至正中賜平章額森魯夫人頁魯爲花圍嘗見白石像放光復捨爲寺勅額大興國報恩寺

香積寺一統志在長安縣南神禾原上通志唐神龍二年建宋太平興國三年改爲開利寺舊有香積堰水入城中遭朱泚亂壞龍首香積以決其流宋時龍首堰復

香積堰廢縣志寺前有大小塔二

唐王維過香積寺詩不知香積寺數里入

雲峯古木無人逕深山何處鐘泉聲咽危石日色冷青松薄暮空潭曲安禪制毒龍

開元寺通志在咸寧縣治西唐開元年建元開元寺碑

開元二十八年正月二十八日元宗於延慶殿與勝光

師論佛恩德乃令天下州府各置開元寺一所宋建隆

四年中書令王彥超修

牛頭寺通志在府城南二十里樊川北勲蔭陂貞元十

一年建咸寧縣志宋太平興國中改爲福昌寺明隆慶



五年修殿前有四季栢形如張蓋四時皆花

唐司空圖牛頭寺詩

終南最佳處禪誦出青霄  
聲木澄幽壑踈烟泛沱寥

西五臺通志在府城西北隅是臺基於唐創於宋屢葺於明有禱必應六月大會歲以爲常總督鄂海於康熙戊戌重修由三天門拾級而升層臺紺閣環列左右最高處爲大士殿登殿四望收一郡之勝

圓光寺通志在府城南六十里太乙山中今稱爲南五臺圓光寺碑記隋仁壽中有毒龍變爲羽人攜藥貨於

長安詐稱仙術大士現比丘身以妙智力伏妖唐大厯六年號爲南五臺山聖壽寺宋太平興國三年夏前後六次現五色圓相祥雲等瑞勅額爲五臺山圓光之寺咸寧縣志千佛寺一名竹林寺在城南七十里即圓光寺下院

寶泉寺明周仲仁碑記亦名元安寺在咸寧縣東南四十里彭村又下寶泉寺在南五臺山下漢時建寺於山頂魏永平中於峯下塑毘盧佛像增建下寶泉寺泉從

竹林寺流至峰下故名唐時即故趾重建元延祐己未  
公主僧格喇實捨金鈔重修泰定四年改峰泉寺明成  
化正德間相繼修葺

普光寺一統志在府城南六十里終南山仰天池上唐  
爲龍池寺縣志明洪武初西印土烏薩羅國僧無壞柱  
錫於此屢著靈異秦愍王爲建上下二寺莊嚴冠長安  
明都穆遊終南山記寺有方池名曰仰天跨以石梁于  
茲玩月爲宜

安國寺通志在咸陽縣城內唐開成六年建石墨鐫華  
唐寂照和尚碑舊在馬跑泉後移城內寺中以碑有安  
國寺字遂改名其寺碑爲唐段成式撰僧無可書

福巖寺臨潼縣志即石甕寺雍勝畧石甕谷在驪山東  
繡嶺兩京道里記谷有懸泉激石成臼似甕形因以名  
寺鄭嵎津陽門詩注開元中以造華清宮餘材修繕佛  
殿中有玉石像幽州所進與朝元閣道像相同精巧無  
比叩之如磬

謹按玉像  
今無存

餘像皆楊惠之手塑脫空像皆

元竒爾製工巧纖麗曠古無儔通志寺西上有綠閣紅樓基址尚存又津陽門詩注驪山石魚巖下有天然石甕以貯飛泉寺僧于上層飛樓中懸轆轤斜引脩綆長二百餘尺以汲甕泉出紅樓高樹之杪縣志綠閣在西紅樓在東下有瀑布千尺聲淙淙林石間仄磴盤空上

下曲折人從栢影中北瞰渭河明膩如綫明袁宏道云

驪山佳處在此

唐權德輿石甕寺詩石甕靈泉勝竇井汲人迴挂青絲綆厨烟半逐白雲飛當

畫老僧

來灌頂

靈泉觀在驪山北雍勝略本華清宮祿山亂後天子罕復遊晉天福中改爲觀賜道士居之

老母殿臨潼縣志在驪山第二峰授經碑記唐李筌居少室山好仙術至嵩山虎石巖得黃帝陰符經不曉其義入秦至驪山下逢一老母神狀甚異路旁見火燒樹因自語曰火生於木禍發必剋筌驚問曰此陰符經語母何得而言之母云受此符已三元六周甲子矣少年從何得之坐石與說其義日已晡袖中出一瓢令筌谷

中取水及還母不見但留麥飯數升筮食之氣血不衰  
入山訪道不知所終

崇皇寺高陵縣志在縣西南申村唐初置宋太宗賜額  
相傳漢薄姬妊文帝而出宮至此栢下誕生文帝俗傳  
唐明皇兩幸於此又名重皇寺內有閣當重邱之上夏  
月居之不暑曰納涼閣

栖禪寺一統志在鄆縣東南四十里圭峰下即姚秦逍  
遙園遺址晉書載記姚興如逍遙園引諸沙門于澄元

堂聽鳩摩羅什演說佛經通志羅什沒後焚之其舌不壞有塔存唐置栖禪寺今名草堂寺明王九思遊終南山記前殿畫壁甚古西南爲鳩摩羅什葬塔有亭覆焉明道先生詩注云寺在竹林之心其竹蓋將十頃乃今根株盡矣獨寺後銀杏四株上薄霄漢亦百年外物也門外諸峰蒼翠如畫

仙遊寺通志在蓋屋縣南三十里仙遊潭明王九思遊南山記仙遊寺榜曰晉緣蓋此地故有仙遊宮因以名



寺寺四面皆山黑水經流其門蓋奧區也殿前石塔塔

下空中塑一病佛側睡且死諸羅漢按摩哭泣籲禱備

極情態寺門西瀕水二石塔上刻吳道子畫諸佛像有

東坡題名

唐韓翃題仙遊觀詩仙臺下見五城樓風物  
淒淒宿雨收山色遙連秦樹晚砧聲近報漢

宮秋疎松影落空潭靜細草香間小洞幽何用別尋方  
外去人間亦自有丹邱白居易送王十八歸山寄題仙  
遊寺詩曾於太白峰前住數到仙遊寺裏來黑水澄時  
潭底出白雲破處洞門開林間暖酒燒紅葉石上題詩  
掃綠苔惆悵舊遊那復  
到菊花時節羨君迴

清源寺一統志在藍田縣南輞谷口唐書王維傳維與

弟縉皆篤志奉佛表輞川第爲寺李肇國史補王維得  
之問輞川別業山水勝絕今清源寺是也縣志即今鹿  
苑寺有王右丞祠

廣濟寺通志在醴泉縣東北二十里有唐刻石鼓經咒  
金大定三年重修

迎祥觀明王恕迎祥觀碑記在城內廣濟街東創自唐  
景龍二年舊名景龍觀按蘇靈芝書老君應現碑云開  
元二十九年元宗夢見老君曰吾乃汝遠祖有像在京

城西南百餘里汝遣人求之吾合與汝于興慶宮相見  
覺而異之即命尚書張九齡道士蕭元裕尋訪於蓋屋  
聞仙峪果得老君玉像高三尺餘以進其日元宗在興  
慶宮遂親迎謁置於殿內次日送景龍觀大同殿安置  
瞻仰與夢中所見無異即改景龍爲迎祥觀仍於現像  
之所建會靈觀焉兩京記景龍觀景雲二年天臺道士  
司馬承禎被召止於此觀縣志令鐘樓懸唐景雲二年

鑄鐘

唐睿宗景龍觀鐘銘原夫一氣凝真含紫虛而構  
極三清韞秘控碧落而崇因雖大道無爲濟物歸

於善貸而妙門有教滅咎在於希聲景龍觀者中宗孝  
和皇帝之所造也層城寫質闡苑圖形但名在騫林而  
韻停鍾簾朕翹情八素締想九元命彼鼓延鑄斯無射  
考虞俎之遺法得晉曠之宏規廣召鯨工遠徵鳧匠耶  
溪集寶麗壑收珍警風雨之辰節昏明之候飛廣扇戾  
屏翳營鑪翥鶴呈姿蹲熊發狀角而不震侈而克揚庶  
其曉散靈音鎮入鴉鷹之殿夕騰仙韻恒流鷓鴣之聞  
聾俗聽而咸痊迷方聞而永悟洪鈞式啟寶宇攸錫其  
銘曰紫宸御厯青元樹因傾巖集寶竭府收珍杜夔律  
應張永規陳彤包九乳儀超萬鈞上資七廟傍延兆人  
風厯韻急霜重音新自茲千歲從今億春懸玉京而薦  
福侶銅史而司辰景雲二年太歲辛亥金九月癸酉金  
朔一十五日

丁亥土鑄成

樓觀元和郡縣志在蓋屋縣東三十七里本周康王大

夫尹喜宅也穆王爲召幽逸之人置爲道士相承至秦漢皆有道士居之晉惠帝時重置其地舊有尹先生樓因名樓觀武德初改名宗聖觀玉海關令尹傳曰尹喜結草爲樓精思至道周康王聞之拜爲大夫以其樓觀望故號此宅爲關令草樓觀即觀之始也一云周穆王尚神仙因尹真人草樓在終南山之陰召幽逸之人尹軌杜冲謂之道士居於草樓之所號草樓觀冊府元龜元宗開元間帝夢京師終南山趾有天尊之像求得之

於齋屋樓觀之側縣志唐高祖自以系出老氏元宗尊  
爲元元皇帝詔改樓觀爲宗聖觀宋端拱三年詔改順  
天興國觀元中統元年復改爲宗聖前爲四子堂及文  
始三清二殿再進則望氣樓其右殿曰景陽有丹井左  
殿曰寶章後爲宗聖宮林莽翠繞有臺據高閣之上曰  
說經臺元至元二年重修樓殿凌空金碧溢目明王九  
思遊南山記樓觀紫雲樓兩層其上爲玉皇像其後仄  
壁爲山水人物畫甚竒非今人筆也

唐岑參樓觀詩草  
樓荒井閉空山闕

今乘雲去不還羽蓋霓旌何處在空餘藥臼在人間宋  
蕪軾樓觀詩門前古碣卧斜陽閱世如流事可傷長有  
幽人悲晉惠強修遺廟學秦皇丹砂久窖井水赤白朮  
誰燒厨竈香聞道神仙亦相過只疑田叟是庚桑又樓  
觀詩鳥噪猿呼晝閉門寂寥誰識古皇尊青牛久已辭  
韓輒白鶴時來訪子孫山近朔風吹積雪天寒落日淡  
孤村道人應怪遊人  
衆汲盡塔前井水渾

會靈觀蓋屋縣志在縣東唐元宗時建冊府元龜開元  
二十九年帝夢一真容云吾是汝遠祖吾之形像可三  
尺餘在京城西南一百餘里帝即命使兼令諸道士相  
隨果於蓋屋縣東南山阜間遇真容迎到便於興慶宮

大同殿安置仍於現像之所建會靈觀焉

尹喜祠蓋屋縣志在老子祠北碑記云真人姓尹名喜字公父天水人涉覽山水於蓋屋聞仙里結草爲樓精思至道後迎老君請著書以惠後世遂屏絕人事著書九篇號闕尹子

顯聖廟三原縣志在縣治內按碑記祀春秋時伍員也唐乾符三年詔司農姬晉卿賚錦織賽湫重修昭宗進封普濟王宋封靈濟昭佑顯聖王明萬厯間封靈湫大



帝重修廟

游巖宮三原縣志在縣治龍橋北安政坊相傳爲唐田  
游巖宅高祖所幸第也唐堊厚記其地勢前對終南後  
枕嵯峨峪水涇渠左右交流爲渭北勝地元中統初邑  
元帥楊子江請天光白真人主之重構殿宇元末燬明  
重建內有神鐘形僅逾尺聲聞數里

靜明觀通志在耀州東五里北有太元洞即唐孫思邈  
隱處石像猶存耀州五臺山志其昇仙臺大門有唐勅

賜靜明觀額字奇勁

李西平王祠通志在高陵縣南十里渭橋北百餘步祀唐李晟墓亦在焉春秋致祭有唐裴度撰碑柳公權正

書

府君廟長安縣志在城西四十里祀唐崔珏武德三年民懷其德爲之建祠太宗夢與神遇遂封號曰府君之神宋大中祥符三年祈嗣有應加封地曹判官遣使致祭元延祐二年封爲護國西齊王建廟始於長安因祀

焉其一在城西二十里崔家莊

宋太平興國觀通志在蓋屋縣東三十里終南鎮玉海  
有神降於蓋屋民張守真家守真爲道士即所居叔北  
帝宮太宗嗣位真君降言有忠孝加福愛民治國之語  
詔於終南山下築宮凡二年宮成宮中有通明殿題曰  
上清太平宮真君預言祀神之夕上望拜太平興國六  
年十一月壬戌封神爲翊聖將軍大中祥符七年加號  
翊聖保德真君凡真君所降語帝命王欽若編爲三卷

宋史禮志太祖神御之殿鳳翔上清太平宮縣志宋太宗以年號名宮今俗呼爲雪樣宮日久圯明代重建

中興寺通志在藍屋縣西南五十里黑水谷仙遊潭上

宋燕軾畱題仙遊潭中興寺東有玉女洞洞南有馬融讀書石室過潭而南山石益竒潭上有橋畏其險不敢渡清潭百尺皎無泥山木陰陰谷鳥嘯蜀客曾遊明月峽秦人今在武陵溪獨攀書室窺巖竇還訪仙姝款石閨獨有愛山心未至不將雙脚踏飛梯

唐太宗廟醴泉縣志舊在縣東三十里宋開寶六年建金天眷元年修廟前有石刻昭陵圖記及六駿圖像明

萬厯間移建縣城南揮塵前錄宋太祖朝嘗詔修先代帝王祠廟令太常禮院重定配享功臣唐太宗以長孫無忌房元齡杜如晦魏徵李靖配

李衛公祠通志在三原縣治西祀唐李靖碑記宋德祐初封衛公爲輔世靈祐王元加忠顯威烈王賜廟額曰仁濟春秋致祭

李光弼祠富平縣志在縣治內宋皇祐元年建邑令王哲毀赤眉祠爲之明萬厯間重修

元丹陽萬壽宮通志在咸寧縣治西南祀馬丹陽雍正八年修又東關外五里許別有萬壽宮今稱牛皮洞有元至正間董仙碑蹟

重陽宮通志在蓋屋縣東六十里祖庵鎮元劉祖謙碑記師姓王名嘉字知明重陽其號咸陽人金正隆間遇至人於甘河後於南時村掘地爲隧封高數尺居三年復自實之遂遷於劉蔣村

即今祖庵鎮

成道時門人建殿號

祖師庵元季門徒道衆會葬祖師重陽真人興建殿閣

名重陽宮內有趙孟頫書勅藏御服碑

周處廟渭南縣志在縣南五十里倒獸谷口續文獻通考元順帝至元三年封晉周處爲英毅武惠正義王明五嶽廟通志在長安縣治東南明正統九年修

本朝重修

太白廟通志在長安縣西郭門外明崇禎間巡撫汪喬年修

本朝總督白如梅重修

臣謹按太白山即禹貢所云惇物山神福應王主祠在鳳翔郿縣境內臣於乾隆三十九年春三月因陝省雨澤少愆率屬於省城太白廟步禱有應臣

奏請

特加封號重修祠宇以答神庥蒙

恩加封昭靈普濟四字山神感沐懷柔凡有禱祈益昭丕應  
至於歷代封典故蹟並詳郿縣卷中

清真寺通志在長安縣東北明洪武十七年尚書鐵鉉



修永樂十一年太監鄭和重修

瑞泉觀通志在渭南縣西南五里觀內有泉四時不涸  
縣志內有秦女峰唐岑參詩云秦女峰頭雪未歸即此  
上有朝元洞泉懸流百丈取水禱雨輒應觀爲明天順  
三年建嘉靖十二年修

孟姜女祠通志在同官縣北三里金山岩下明馬理孟  
姜女祠碑記秦始皇時有孟姜女楚地澧人范喜妻也  
姓姜氏歸三日范赴長城之役姜女製寒衣往尋范不

見乃遠城而哭哭聲震地城一隅爲之隳雲霧中范見其像女嚙指出血滴骸滲入者知爲其夫遂負之歸至宜君山渴甚痛哭地湧甘泉令名哭泉南至同官水灣乃負骸置西巖石龕下坐其旁而逝邑人重其節義乃即其遺骸塑雙像祀之其龕中石隙祠人致誠以燎燭之則有金釵出見示神異焉萬曆二十二年重修

董子祠通志在府城東南下馬陵祀漢儒董仲舒祠後即仲舒墓明嘉靖二十一年建

杜工部祠咸寧縣志在樊川祀唐工部杜甫明嘉靖間建

顏魯公祠通志在藍田縣藍橋明天啟六年建春秋致祭

韓文公祠通志在藍田縣秦嶺縣志一在北郭本湘子祠明萬曆三十七年改肖文公像於中祀之

晉公廟通志一在藍田縣東三十里一在縣西三十里明建祀唐裴度又渭南縣治西關外官路北有裴晉公

祠明嘉靖間建通志公河東人其苗裔散在四方渭獨  
居多因立祠縣志初與寇萊公並祀額曰二公祠順治  
八年增祀蔡孝子順王節度忠嗣白侍郎樂天更名五  
賢祠

忠烈祠名山記按三輔會要烈士段秀實廟在臨潼縣  
西十里斜口鎮西南縣志俗呼爲烈神廟

呂氏祠通志在藍田縣北五里舊無專祠明成化年即  
其故地建祠仲春致祭又縣西有三呂祠明成化十九

年巡撫阮勤奏藍田縣有呂大忠大臨大鈞祠歲久淪  
毀乞修治賜祭下有司修飾之歲一祭

本朝廣仁寺通志在長安縣西湖園教場西北康熙四十  
四年

聖祖仁皇帝勅建

御賜慈雲西蔭殿額并

御製廣仁寺碑文云朕存心天下矚顧西陲惟茲關隴之區實  
切封疆之重歲當癸未特舉時巡省方設教訓吏寧人已責

除租行慶布德引年賜帛獎學興賢所過山川聖哲祠域遣  
修祀事用殫精裡凡所以裨邦政厚民生者靡弗致勤焉又  
以運際承平無忘武備簡稽將士整飭戎行發內帑之金錢  
普軍中之頒給爰於演武之場躬親校閱之典以建威銷萌  
之義有觀德習禮之風顧念久安長治務在因俗宜民若乾  
竺之傳言雖殊尚而利濟之道指有同歸閱武之頃周覽地  
形相其爽塏命創招提即大賚之餘貲爲雙林之小築厥工  
匪侈逾載告竣斯役也經營適協乎輿情銖黍不煩夫民力

將使黃山巖岫秀比靈山渭水波濤凝如定水洪河浪息波  
法海之津梁華嶽雲開通耆閣之轍跡五陵六郡之衆迴向  
香城外蕃屬國而遙羣遊淨土資神光之常護上以祝

慈壽於無涯助王化之遐宣下以錫民庶於有永其亦朕綏懷  
寰宇順導烝黎之至意也歟於是題廣仁之額標括三乘書  
多寶之碑昭垂奕葉云爾康熙四十四年十一月初一日

白龍廟整屋縣志在縣治廟後流泉足資灌溉每歲夏  
四月祭祀康熙二十一年修

女華神廟通志在同官縣北長安志山層峰秀出每大風雷多從華岳至此舊傳華岳女君在此山人因立祠每水旱禱焉康熙三十五年修

丁蘭廟通志在興平縣北五里孝子村康熙三十九年重建碑云孝子河內人寓居茂陵人敬之立祠以祀

張橫渠祠縣志在臨潼縣城中康熙三十七年建橫渠書院祀公於講堂北按伊洛淵源錄云橫渠再移疾西歸過洛陽別二程行李蕭然至臨潼而沒門人挽車而



葬於郿

三皇祠通志在藍田縣北三十里祀華胥氏伏羲氏女

媧氏蓋伏羲女媧皆華胥氏所出故祀於故里

以下祠  
宇建置

時代  
無攷

金山神廟長安志在藍田縣南十里輞谷口金山之前

舊圖經曰黃帝滅蚩尤之衆於此蓋風后之祠

鹿臺神廟通志在高陵縣西南三十里鹿苑原上佐軒

韓破蚩尤者又旁有雷石風洞俗名雨磨禱雨多應太

平寨宇記今號爲鹿臺將軍

成湯廟通志在興平縣治西北二十里始建之義無攷  
後人遂名其地爲湯祠鄉

漢高祖廟通志一在興平縣東南二十里樊噲城北一  
在縣西南三十里龍過村

黃山宮興平縣志在縣西三十里馬嵬鎮即漢代老子  
祠故址內有太上槐

露臺祠縣志在驪山東南二十里漢文帝廟也帝欲作

露臺惜百金中人十家產而止民感之立祠其地有露臺故基又縣西北二十里有龍淵廟祀漢武帝

王翦廟通志在富平縣北六十里其一爲頻山神廟在縣北三十五里亦祀秦王翦又錦屏山上亦有王翦廟霍光廟鄆縣志在縣東十里金山建置無攷東觀漢記永平二年十一月詔京兆右扶風以中牢祀霍光

蔡孝子祠渭南縣志在縣城東祀漢孝子蔡順今孝子里有順墓在焉

祫祠廟通志在耀州東一里即祫祠故城漢宣帝二年  
鳳凰集亦名鳳凰臺祫祠令有遺愛因祀之耀州志廟  
南有祫祠塚即令葬處

馬周祠渭南縣志在縣東十里官路南周勸太宗勵精  
圖治澤被羣黎故其祠至今猶存

汾陽王廟一統志在涇陽縣東門內祀唐郭子儀

寇萊公祠通志在渭南縣北五十里下邽鎮鎮即公故  
里也

程子祠通志在鄆縣治北祀明道先生

關中勝蹟圖志卷七

欽定四庫全書

關中勝蹟圖志卷八

陝西巡撫臣畢沅撰

古蹟郊邑

西安府上古造書臺雍勝畧長安縣西三十里三會寺  
有臺即蒼頡造書處法苑珠林唐西明寺道宣律師逐  
靜在京師城南故靜業寺修道忽有一人來至律師所  
問今西京高四土臺俗云是蒼頡造書臺如何答曰蒼

頡於此臺上增土造臺觀鳥跡者非無其事又有天  
姓陸名元暢來謁律師云所聞高四土臺者本迦葉佛  
於此第三會說法度人至穆王時文殊目連來即列子  
所謂化人者也云高四臺是迦葉佛說法處因造三會  
道場至秦穆公時扶風獲一石佛穆公棄馬坊中穢污  
此像公夢之上帝所極被責疏覺大怖又欲造佛像於  
高四臺臺上造重閣高三百尺人號高四臺曰高四樓

唐岑參題三會寺蒼頡造字臺詩野寺荒臺  
晚寒天古木悲空塔有鳥跡猶似造書時



陰康氏陵路史陰康氏葬浮肺山之陰注驪山也冢今存焉

華胥渚通志在藍田縣北三十五里伏羲氏母居也今陵及華胥溝毓聖橋枯棗樹俱存

尊盧氏陵通志在藍田縣東三十里玉山之西路史尊盧氏葬浮肺山之陰注即今藍田山見後魏風土記流金泊通志在涇陽縣北五十里黃帝鑄鼎處

夏三過村鄠縣志在縣北二十里按輿地志鄠古崇國

也連山易云顓頊五代孫繇封於崇史記繇治水功用不成禹痛父罔功八年三過其門不入今三過村舊傳即其處也

甘亭長安志在鄠縣西南五里漢書在甘水之東長水鄉史記夏本紀注馬融曰甘有扈氏南郊地名索隱曰夏啟所伐扈南有甘亭

商亳亭史記六國表注徐廣曰京兆杜縣有亳亭

王季陵通志在鄠縣西五里漢陂村戰國策昔王季葬

於楚山

謹按論衡作滑山

之尾欒水

謹按即大欒水出鱗遊

蓄其墓史記

周本紀注皇甫謐曰葬鄠縣之南山鄠縣志春秋祀焉

周文王陵通志在咸陽縣北一十五里畢原上山海經

狄山文王葬其所竹書紀年文王葬畢西於豐三十里

長安志漢書曰太子發上祭於畢下至於盟津畢文王

墓近鎬也會典文武成康陵俱陝西西安府祭

武王陵咸陽縣志在文王陵北汲冢周書成王元年夏

六月葬武王於畢

成王陵咸陽縣志在文王陵西南長安志在縣西北二十里

康王陵咸陽縣志在文王陵東南長安志在縣北十五里通志成王陵藍屋分祭康王陵鄠縣分祭

穆王陵長安志在長安縣西南二十五里張恭村村近咸陽

恭王陵咸陽縣志在文王陵南

周公墓咸陽縣志在文王陵東墓前有廟史記魯世家

周公在豐病曰必葬我成周以明吾不敢離王既卒成  
王葬周公於畢以明不敢臣周公也

太公墓咸陽縣志在文王陵東史記齊世家注太公封  
於營邱比及五世皆反葬於周

八士墓咸陽縣志在縣東五十里

烽火樓雍勝畧在驪山上第一峰史記周本紀褒姒不  
好笑幽王欲其笑舉烽火諸侯至而無寇乃大笑

幽王城長安志一名幽王壘在臨潼縣東南戲水上城

高八尺周二百尺十步國語曰幽王滅於戲蕪林曰新豐縣東南戲亭是也有陵在焉長安志兩京道里記曰陵高一丈三尺周二百步

扁鵲墓通志在臨潼縣東北三十里史記扁鵲傳扁鵲

渤海郡鄭人

謹按徐廣曰鄭當為鄭

為醫名聞天下來入咸陽秦

太醫令李醢自知伎不如鵲使人刺殺之

老子墓通志在藍屋東南三十里水經注曰就水北逕大陵即此今吾老洞有老子首骨石函土封覆以屋水

經注大陵世謂之老子陵昔李耳為周柱史以世衰入戎於此有家事非經證然莊周著書云老聃死秦失弔之是非不死之言

秦子午鎮通志在長安縣南五十五里宋景佑三年置以南山子午谷名舊有子午關戰國策秦張儀曰秦一軍塞午道鮑彪注北山是子南山是午顏師古曰今京城直南山有谷通梁漢道者名子午谷三秦記長安正南山名秦嶺谷名子午胡三省通鑑注唐廣德二年吐

蕃既去亡軍逃卒猶竄伏南山子午等五谷為患南山  
西接岐山東抵虢州界谷之大者有子谷駱谷斜谷藍  
田衡嶺五谷通鑑地理通釋梁王神念以舊路沿山避  
水橋梁多毀別開乾路更名子午道即此路是也舊道  
在今金州安康縣界語曰山水險阻黃金子午魏張劭  
由子午欲攻漢中曹真從子午南入漢中桓溫伐秦命  
司馬勛出子午道漢平帝元始五年王莽通子午道從  
杜陵直絕南山徑漢中因置關宋於子午谷口置陽嶺



寨西城路置渭門寨分水寨皆備禦之要

中橋渡即古中渭橋長安志在縣西北二十五里括地志本名橫橋架渭水上橋對橫門故名史記文帝紀代王至渭橋注蘓林曰在長安故城東三里索隱曰咸陽宮在渭北興樂宮在渭南秦通兩宮之間作渭橋漢書張釋之傳文帝行出中渭橋有人從橋下過驚乘輿馬注索隱曰渭橋有三所一在城西北咸陽路曰西渭橋一在東北高陵路曰東渭橋其中渭橋在故城之北三

輔黃圖渭水貫都以象天漢橫橋南渡以法牽牛水經注渭水經長安縣北水上有梁謂之渭橋秦制也亦曰便門橋橋廣六丈南北二百八十步六十八間七百五十二柱一百二十二梁南北有隄激立石柱柱南京兆立之柱北馮翊立之有令丞各領徒一千五百人橋之北首壘石水中故謂之石柱橋後董卓入關遂毀此橋魏武帝更造橋三丈六尺通鑑晉永和十二年秦主生發三輔民治渭橋元和郡縣志劉裕入關又毀之後魏重造

唐貞觀十年移於今所雍錄舊名渭橋因西有便門橋  
東有東渭橋故加中以別之水經注又名為便門橋亦  
取通渭南北往來皆便也

邵平瓜田雍勝畧在舊長安城東門外今長安縣之西  
北也水經注廣陵人邵平為秦東陵侯秦破為布衣種  
瓜青門外瓜美世謂之東陵瓜

皇子陂長安志在萬年縣南二十五里水經注皇子陂  
在樊川太平寰宇記陂在啟夏門南三十里陂北原上

有秦王子冢因以為名杜甫詩天寒皇子陂隋文帝改曰永安陂周迴九里

蘭池陂雍勝畧在咸寧縣東二十五里三秦記始皇引渭水為長池東西二百里南北二十里築為蓬萊山刻石為鯨魚長二百尺亦曰蘭池陂

昭襄王墓史記秦始皇本紀葬涇陽通志括地志云在雍州新豐縣西南三十五里以地計之當在咸寧界中孝文王壽陵通志在咸寧縣通化門外史記秦始皇本

紀孝文王塋壽陵注陵在雍州萬年縣東北二十五里  
莊襄王陵通志在咸寧縣通化門外今青門大冢是或  
曰韓信冢非也史記莊襄王塋芷陽注括地志云陵在  
雍州新豐縣西南三十五里始皇陵在北亦謂為見子  
陵

二世皇帝陵咸寧縣志在宜春苑南史記秦始皇本紀  
趙高以黔首塋二世杜南宜春苑中注括地志云陵在  
雍州萬年縣南三十四里

章邯臺通志在興平縣東南十里按項羽封章邯為雍王都廢邱故有此臺

露臺通志臨潼縣驪山東南三十里秦始皇露臺在焉坑儒谷長安志在臨潼縣西南五里漢書儒林傳注師古曰今新豐縣溫湯之處號愍儒鄉溫湯西南三里有馬谷谷之西岸有坑古相傳以為秦坑儒處也

佷石長安志在臨潼縣東十里秦始皇陵東南二里形似龜初始皇遠採此石將致之驪山至此不復動石崇

一丈八尺周十八步

始皇陵通志在臨潼縣一十五里史記秦始皇本紀始  
皇初即位穿治鄠山及并天下以七十餘萬人穿三泉  
下銅而致槨宮觀百官奇器珍怪徙滿藏之令匠作機  
弩矢有所穿近者輒射之以水銀為百川江河大海機  
相灌輸上具天文下具地理以人魚膏為燭度不滅者  
久之漢書劉向傳始皇葬鄠山之阿下錮三泉上崇三  
墳其高五十餘丈周迴五里有餘石槨為游館人膏為

燈燭水銀為江海黃金為鳧鴈項籍燔其宮室營宇往

者咸見發掘其後牧兒亡羊羊入其鑿

師古注鑿所  
謂穿冢藏者

牧

者持火照求羊失火燒其藏擲漢舊儀始皇使丞相李

斯將天下刑人徒隸七十二萬人作陵三十七歲深極

不可入秦之曰丞相臣斯昧死言臣所將隸徒治驪山

者已深已極鑿之不入燒之不然叩之空空如下天狀

制曰其旁行三百丈乃止水經注始皇大興厚葬營建

冢壙於麗戎之山斬山鑿石旁行周迴三十餘里墳高



五丈項羽入關發之以三十萬人三十日運物不能窮  
關中盜賊銷擲取銅牧人尋羊燒之火延九十日不能  
滅博物志始皇陵在驪山泉本北流障使東西流又運  
取大石於渭北渚故歌曰運石甘泉口渭水為不流千  
人唱萬人謳金陵餘石大如堰土屋其餘功力皆如此  
類兩京道里記陵高一千二百四十尺內院周五里外  
院周十一里俗呼當陵蓋以南嶺作望峯言築陵望此  
為準都穆驪山記始皇陵內城周五里舊有門四外城

周十二里其趾俱存自南登之二邱並峙人曰此南門也右門石樞猶露土中陵高可四丈昔項羽黃巢皆嘗發之老人云始皇墓山中此特其虛冢

子嬰墓臨潼縣志子嬰扶蘇墓在新豐西北隅

鐘官城元和郡縣志一名灌鐘城在鄠縣東北二十五里秦始皇收天下兵器銷為鐘鐻處

藍田關元和郡縣志在藍田縣東南九十八里括地志即秦燒關也史記高帝紀秦王子嬰遣將拒燒關沛公

引兵繞峽關踰蕢山擊秦軍大破之注應劭曰峽山之  
關李奇曰在上洛北藍田南武關之西水經注渥水西  
逕峽關北歷峽柳城又魏土地紀峽關地名峽柳道通  
荊州雍錄藍田縣即峽柳城也水經亦謂之青泥城峽  
山在縣南二十里故又名峽關亦名藍田關通典七盤  
十二絳藍田之險路太平寰宇記後周明帝元年自峽  
關徙置青泥故城側改曰青泥關武帝建德二年改為  
藍田關隋煬帝大業元年徙復舊所藍田關因縣為名

灰埴通志在渭南縣西南五里崇三十尺周一百步俗傳秦始皇焚書處

王翦墓通志在富平縣東四十里縣志翦墓左六冢相傳為六國圖書每歲二月八日鄉人望其墓若海市狀

謹按關中陵墓志作六月朔望日

城闕依然車馬交錯其上豈地氣使

然歟

孟姜女墓通志在同官縣北三里女迴山雍勝畧姜女至長城尋夫而迴卒於山下遂葬焉故地名女迴山

漢軹道亭通志在漢長安城東十三里漢書高帝本紀  
秦王子嬰素車白馬繫頸以組封皇帝璽符節降軹道  
旁注蘓林曰亭名也

灞上雍大記在通化門東三十里灞河西岸漢王元年  
十月沛公至灞上子嬰降文帝六年宗正劉禮為將軍  
次灞上

樊鄉雍錄在長安城南水經注樊川即杜之樊鄉也漢  
祖至櫟陽以將軍樊噲灌廢邱最賜邑於此鄉也

霸陵亭史記李廣傳李廣家居數歲廣與故潁陰侯孫居藍田山中射獵嘗夜從一騎出從人田間飲還至霸陵亭霸陵尉醉呵止廣廣騎曰故李將軍尉曰今將軍尚不得夜行何乃故也廣宿亭下

朱博村通志去杜祠三里朱博丞相故里也在華巖寺北倚少陵下瞰終南

霸橋咸寧縣志在府城東北二十里霸橋鎮水經注霸水有橋謂之霸橋初學記漢作霸橋以石為梁漢書王

莽傳莽更名長存橋三輔黃圖霸橋跨水作橋都人送  
客至此折柳贈別開元遺事長安東霸陵有橋來迎去  
送至此黯然故人呼為銷魂橋元和郡縣志隋開皇三  
年造更以石為之長安志唐景龍二年仍舊所為南北  
兩橋通志漢霸橋在長安城東二十里霸店南北兩橋  
以通新豐道唐霸陵橋在京兆通化門東二十五里元  
時山東唐邑人劉斌修築凡一十五虹長八十餘步濶  
二十四尺中分三軌旁翼兩欄有華表鯨頭鼉首築隄

五里栽柳萬株遊人穀擊肩摩為長安壯觀咸寧縣志  
宋時橋記韓縝重修元季又嘗修葺明成化六年布政  
使余子俊增修今沙石壅塞遺趾僅存

本朝康熙六年造大小船各一以濟渡水落架木為橋別  
有渡入藍田路

文帝霸陵咸寧縣志在白鹿原東北厓去城四十里史  
記孝文帝本紀帝治霸陵皆以瓦器不得以金銀銅錫  
為飾不治墳欲為省毋煩民注應劭曰因山為藏不復



起墳山下川流不過絕也就其水名以為陵號水經注  
霸水左合滙水歷白鹿原東即霸川之西故芷陽矣漢  
文帝葬其上謂之霸陵元和郡縣志白鹿原亦謂之霸  
上王仲宣詩曰南登霸陵岸回首望長安即此也通志  
霸陵在霸水東因山為墳道南有秦時銅人十二董卓  
鑄以為錢餘二枚尚存即薊子訓與老人摩挲銅狄處  
會典漢文帝陵陝西咸寧縣祭

宣帝杜陵通志在咸寧縣境漢書宣帝本紀元康元年

春以杜東原上為初陵更名杜縣為杜陵徙丞相將軍  
列侯吏二十石訾百萬者杜陵元帝本紀初元元年春  
正月孝宣皇帝葬杜陵三輔黃圖帝在民間時好遊鄠  
杜間故葬此長安志杜陵之制正方詢之居人每方二  
十步據地六十畝四面去陵十餘步皆有觀闕基趾漢  
書外戚孝宣皇后傳孝宣王皇后合葬杜陵稱東園會  
典漢宣帝陵長安縣祭

許后少陵咸寧縣志宣帝許后葬杜陵南園謂之少陵

漢書外戚傳注顏師古曰即今所謂小陵者長安志少陵原南接終南北至滻水西屈曲六十里入長安縣界即漢鴻固原也通志唐杜甫居少陵即此

韓信墓通志在古長安城東三十里新店墓前有廟

樊噲墓咸寧縣志在神禾原

夏侯嬰墓通志在咸寧縣東臨霸水史記夏侯嬰傳注索隱曰三輔故事云嬰墓在飲馬橋東大道南俗謂之馬塚博物志云公卿送嬰葬至東都門外馬不行培地

悲鳴得石柳有銘曰佳城鬱鬱三千年見白日吁嗟滕  
公居此室乃葬之

丙吉墓咸寧縣志在府城東南三十里新莊村俗呼塌  
塚

張安世墓咸寧縣志在城南八里

蕭望之墓通志在府城東南五里

董仲舒墓咸寧縣志在城內胭脂坡下長安志下馬陵  
在萬年縣南六里韋述西征記本董仲舒墓李肇國史

補曰昔漢武帝幸芙蓉園即秦之宜春苑也每至此墓  
下馬時人謂之下馬陵歲月深遠誤傳為蝦蟆陵

棘門長安志在咸陽縣東北十六里漢文帝後二年徐  
厲為將軍次棘門孟康曰在長安北秦時宮門也三輔  
黃圖棘門在橫門外

西渭橋咸陽縣志在縣東南百步漢書武帝本紀建元  
三年初作便門橋注服虔曰在長安西北茂陵東去長  
安二十里師古曰便門長安城南面西頭第一門作橋

跨渡渭水以趨茂陵其道易直即今所謂便橋是其處也水經注渭水上有便門橋與便門對直通與便門橋亦曰便橋雍錄武帝作茂陵在渭北興平縣西南十里秦世已有中橋可趨興平迂迴難達便門在長安西於趨陵得以云便漢元帝欲御樓船用薛廣德諫舍船從橋即此唐太宗初即位幸城西與頡利盟於便橋之上則橋在城西長安志唐末廢乾德四年重修後為暴水所壞淳化三年徙置孫家灘至道二年復修於此咸陽

縣志漢名便橋唐名咸陽橋今廢秋作橋水漲用船其  
地以橋名亦以渡名明嘉靖間以舟為浮橋又曰咸陽  
古渡

高帝長陵通志在咸陽縣東三十里亦曰長山其北有  
蕭城蕭何築以守長陵漢初徙關東豪族以奉陵邑長  
陵茂陵各萬戶皆屬太常不隸於郡長陵令秩千鍾陪  
塋諸臣蕭何張良曹參紀信在其東史記高祖本紀十  
二年四月塋長陵注皇甫謐曰長陵山東西廣百二十

丈高十三丈在渭水北去長安三十五里漢書高后本紀六年夏六月城長陵注張晏曰起縣邑故築城也師古曰此說非也黃圖云長陵城周七里百八十步因為殿垣門四便殿掖庭諸宮寺皆在中是即就陵為城非止謂邑居也皇覽高帝呂后山各一所外戚世家注關中記曰高祖陵在西呂后陵在東漢帝后同塋則為合葬不合陵也諸陵皆如此長安志關中記曰長陵城有西北南三面東面無城陪葬者皆在東徙關中大族萬



家以為陵邑通志戚夫人墓在長陵之東

惠帝安陵通志在咸陽東三十五里周之程邑也史記  
呂后本紀注皇覽云山高三十二丈廣袤百二十步皇  
甫謚曰去長陵十里長安志關中記曰徙關東倡優樂  
人五千戶以為陵邑善為啁戲故稱女啁陵也

昭帝平陵通志在咸陽縣東北一十三里漢書昭帝本  
紀元平元年六月葬平陵三輔黃圖平陵去茂陵十里  
帝初作壽陵石槨廣一丈二尺長二丈五尺無得起墳

陵東北作廡長三丈五步外為小厨裁足祠祀萬年之後掃地而祭

元帝渭陵通志在咸陽縣東北一十三里漢書元帝本紀竟寧元年七月葬渭陵水經注渭陵非謂元帝陵蓋在渭水之南故曰渭陵也

成帝延陵雍錄在咸陽縣西北一十三里漢書成帝本紀綏和二年四月葬延陵三輔黃圖王莽時遣使壞渭陵延陵杲思曰毋使民復思也又以黑色洿其周垣

哀帝義陵雍錄在咸陽縣西八里漢書哀帝本紀元壽  
二年秋九月葬義陵平帝本紀元始元年詔義陵民家  
不妨殿中者勿發

平帝康陵通志在咸陽縣西二十五里漢書平帝本紀  
元始五年冬十二月葬康陵三輔黃圖在興平原口

趙王如意墓通志在咸陽縣東北二十五里呂后陵西  
蕭何墓通志在咸寧縣東北三十里史記蕭相國世家  
注東觀漢記云蕭何墓在長陵東司馬門道北百步

曹參墓通志在咸陽縣東北二十五里

周勃墓通志在咸陽縣東四十里水經注鄭國故渠逕周勃冢南渠東南謂之周氏曲

馮唐墓通志在咸陽縣東北八里

揚雄墓通志在咸陽縣揚雄家牒子雲天鳳五年卒葬安陵坡上新論揚子雲在長安亡其兩男皆歸葬於蜀遂困乏病卒以貧困故葬長安妻子棄其墳墓歸蜀

武帝茂陵通志在興平縣東北一十七里漢書武帝本

紀後元二年三月葬茂陵關中記漢諸陵皆高十二丈  
方百二十步惟茂陵高十四丈方一百四十步徙民者  
凡七陵長陵茂陵各萬戶餘皆各五千戶

李夫人墓長安志亦名習仙臺高二十丈周一百六十  
步在縣東北一十六里漢書外戚傳夫人卒上以后禮  
葬焉水經注茂陵西北一里即李夫人塚塚形三成世  
謂之英陵一作萊陵三輔黃圖李夫人墓在茂陵西北

一里俗名英陵亦名集儂臺

謹按英萊以字形相近  
而誤稱未知孰是也

衛青墓長安志在興平縣東北一十五里崇二十丈漢書衛青傳青尚平陽公主與主合葬起冢象廬山注師古曰在茂陵東次去病冢之西

霍去病墓長安志在興平縣東北一十九里崇二丈漢書霍去病傳去病元狩六年薨上發屬國元甲軍陳自長安至茂陵為冢象祁連山

公孫宏墓通志在興平縣東北一十里

霍光墓通志在興平縣茂陵東南一里漢書霍光傳地

節二年光薨諡曰宣成侯發三河卒起家置園邑三百  
家禹既嗣侯太夫人顯改光時所自造塋制而侈大之  
馬融墓興平縣志在縣西南三十里按馬融嘗居扶風  
茂陵卒塋於此故有墓俗名為馬蓮冢後漢書馬融傳  
融年八十八延熹九年卒於家遺令薄塋

丁蘭墓興平縣志在縣東北一十里蘭河內人有孝行  
卒塋於此

鴻門通志在臨潼縣東三十里史記項羽本紀項羽兵

在新豐鴻門沛公從百餘騎見項王至鴻門雍錄鴻門也者驪山之北十里而新豐之東十九里也地有坂橫亘大道中鑿隧路以為門徑故曰鴻門縣志今地有鴻門堡

櫟陽鎮臨潼縣志在縣北五十里即塞王司馬欣所都自高祖移都長安遂廢後為鎮

新豐鎮臨潼縣志在縣東北二十里即漢高祖所立新豐故地史記高祖本紀十年更名酈邑曰新豐水經注



高祖象舊里制新邑立城社樹枌榆令街庭若一

露臺雍錄顏師古曰在今新豐縣南驪山之頂有露臺鄉極為高顯猶有文帝所欲作臺之處十道志曰漢文帝罷露臺於此然則驪山露臺文帝已有成基而惜費不肯竟役者也

三田村通志在臨潼縣田真田慶田廣兄弟分而復合  
荆花再生即此墓在村內

太上皇陵通志在臨潼縣東北七十五里漢書高帝本

紀十年秋七月葬太上皇萬年注師古曰高祖初居櫟陽故太上皇在櫟陽十年葬其北原起萬年邑置長丞三輔黃圖其後在東者太上皇西者昭靈后也

馮衍墓通志在臨潼縣東一十四里後漢書馮衍傳自論以新豐之東鴻門之上壽安之中地勢高敞四通廣大南望鄜山北屬涇渭東瞰河華龍門之陽三晉之路西顧鄠鄆周秦之邱宮觀之墟通視千里覽見舊都遂定塋焉長安志墓崇二丈

渭橋渡通志在高陵縣南十五里霸水合渭之處漢高祖造以通櫟陽之道史記景帝紀景帝五年作陽陵渭橋注索隱曰渭橋在長安東北通高陵路初學記漢造西渭橋東渭橋以木為柱通鑑唐建中四年劉德信入援以東渭橋有積粟進屯此橋興元元年韓滉運米百艘餉李晟進至東渭橋通志今橋廢用舟濟故以渡名景帝陽陵通志在高陵縣西南三十里鹿苑原上史記孝景帝本紀孝景四年後九月以弋陽為陽陵五年三

月作陽陵注索隱曰豫作壽陵也皇甫謐曰陽陵方百  
二十步高十四丈去長安四十五里漢書景帝本紀五  
年春正月作陽陵夏募民徙陽陵賜錢二十萬後三年  
二月癸酉葬陽陵漢書外戚傳孝景王皇后武帝母也  
合葬陽陵

張耳墓通志在高陵縣西李趙村

陳平墓通志在鄆縣南十里方勝村

婁敬墓通志在鄆縣北五里婁村

射鴈臺通志在藍田縣北二十里漢將軍李廣之莊也  
廣屏居藍田山下出獵見草中石以為虎而射之中石  
沒羽今挂弓樹尚存地名官莊

李陵母墓通志在涇陽縣西北三十里仙法村

第五倫墓通志在涇陽縣西五十一里清谷口北

季布墓蓋屋縣志在縣西啞栢鎮西南三里

蔡順墓渭南縣志在縣東南孝子村順汝南人西漢末  
避地入長安遯處此里歿遂葬焉

三國駱谷道通志在盩厔縣西南一百二十里三國志曹爽傳魏正始四年曹爽發六七萬人從駱谷入行數百里不得進元和郡縣志甘露三年蜀將姜維出駱谷圍長城卽此道近代廢塞武德七年復開雍錄高祖於此立關通梁州名駱谷關續通典自長安取駱谷路至興元府六百五十二里太平寰宇記東北自鄠縣界西北逕盩厔縣又西南入駱谷出谷入洋州興勢縣界漢魏舊道也通鑑地理通釋南口曰儻谷北口曰駱谷長

安志駱谷關在京北府盤屋西南一百二十里武德七年開駱谷道以通梁州在今關北九里貞觀四年徙於此盤屋縣志西駱谷在縣西南三十里谷南八十里為十八盤嶺又南下十里至河底為故駱谷關明設二巡司於山谷不設守兵盜起路遂塞

晉淨土樹名山記在高陵縣南八里俗傳西域鳩摩羅什憇此遂生茲樹二月開如楊花八月結實狀如小栗殼中皆黃土

後秦姚萇墓高陵縣志在縣西北十里積灰為之方幾一里俗稱灰堆坡十六國春秋後秦錄姚萇墓原陵姚興墓偶陵

赫連臺通志在涇陽縣西三十里赫連勃勃駐兵所在今橋底鎮東有遺趾

魏王樓耀州志姚萇兄姚襄所建今故趾存四望俱石山奇峭如屏障然樓南有襄教軍塲考晉書襄招集北地戎夏歸附者五萬餘戶是時北地王徙泥陽後襄與



帝置有二石人卓立即郡門所在人稱為石婆婆原  
周文帝成陵通志在富平縣鳳凰山宋太祖建廟於陵  
前周書文帝本紀太祖文皇帝魏恭帝三年冬葬於成  
陵皇后列傳元皇后合葬

隋定官石鄆縣志隋唐間隕於鄆縣人家園中化為巨  
石移府城九街唐時舉人就試以鐵釘釘之驗其中否  
後置藩署以卜官云官清而顯者釘之入否則弗入因  
號定官石

宜壽城通志在盩厔縣南三十里即隋之宜壽宮城也  
高頰墓通志齊國公高頰墓在醴泉東五十里

唐韓莊通志即韓退之城南雜題又送符城南讀書之  
處也莊在韋曲東皇子陂南引陂水為南塘後為里人  
楊氏所有穿洞起閣引泉落池

第五橋長安縣志在縣南二十里沈橋里以姓得名通  
志韋曲之西有華嚴寺寺西有鴈鶩陂陂西北有第五  
橋杜甫詩不識南塘路今知第五橋

三橋長安縣志在縣西二十里唐書李晟傳唐興元元年上自興元還長安李晟戎服謁見於三橋通鑑乾寧二年上幸石門李克用遣騎三千駐三橋為備禦

杜如晦墓長安志在萬年縣南三十里

顏師古墓長安志在縣南三十里關中陵墓志師古從

太宗征高麗卒葬長安城南

謹按今地在咸寧界

郭敬之墓咸寧縣志在城南二十里苗晉卿郭敬之神道碑天寶三載終於京師葬京兆少陵原公之子子儀

追贈太保

渭城雍錄咸陽之東境也唐世有事西域故行役者以出陽關為言既渡渭以及渭城則趨玉門陽關者皆由此始故王維詩隨地紀別而曰渭城陽關其實霸橋折

柳故事也

唐王維渭城曲渭城朝雨浥輕塵客舍青青柳色新勸君更進一杯酒西出陽關無故人

元丞相墓通志在咸陽縣白居易元微之墓志太和五年七月薨於位六年七月附葬於咸陽洪瀆原從先兆宅也

馬嵬堡興平縣志在縣西三十里上有楊貴妃墓晉書  
苻堅載記晉太元十一年苻麟保據馬嵬為姚萇所破  
姚興載記太元十九年苻登自六陌趣廢橋後秦姚詳  
據馬嵬堡以拒之雍錄馬嵬有故城在雍都西九十里  
唐置驛元宗幸蜀貴妃楊氏死於此白居易詩曰西出  
都門百餘里是也通志貴妃粉出馬嵬坡上土白如粉

唐劉禹錫馬嵬行綠野扶風道黃塵馬嵬驛路邊楊貴  
人墳高三四尺乃問里中兒皆言幸蜀時軍家誅佞倖  
天子舍妖姬羣吏伏門屏貴人牽帝衣低回轉美目風  
日為無暉貴人飲金屑倏忽奔英暮平生服杏丹顏色

真如故，屬車塵已遠。里巷來窺覷，共愛宿妝妍。君王畫  
眉處，履綦無復有。履組光未滅，不見巖畔人。空見凌波  
襪，郵童愛踪跡。私手解鞶結，傳看千萬眼。縷絕香不歇，  
指環照骨明。首飾敵連城，將入咸陽市。猶得賈胡驚，李  
商隱馬嵬詩。海外徒聞更九州，他生未卜此生休。空聞  
虎旅鳴宵柝，無復雞人報曉籌。此日六軍同駐馬，他時  
七夕笑牽牛。如何四紀為天子，不及盧家有莫愁。溫庭  
筠馬嵬詩。穆滿曾為物外遊，六龍經此暫淹留。返魂無  
驗青燐滅，埋血空生碧草愁。香輦却歸長樂殿，曉鐘還  
下景陽樓。甘泉不復重相見，誰道文成是故侯。鄭畋馬  
嵬坡詩。肅宗迴馬楊妃死，雲雨雖亡日月  
新。終是聖明天子事，景陽宮井又何人。

零口鎮臨潼縣志在縣東北四十里又曰泠口泠水至  
此入渭通鑑唐天復初朱全忠入關自赤水進至零口

西續通典昭應縣界有零口蓋古鴻門地

段秀實墓通志在臨潼縣西十五里斜口鎮道北有祠  
祠北二里西偏有墓

黃番綽墓臨潼縣志在縣東北三十里

一行禪師墓長安志在銅人原明皇幸溫湯過其塔前  
駐馬徘徊

鹿臺城通志在高陵縣南二十五里有果園名鹿苑唐  
析置鹿苑縣有鹿臺祠在鹿苑原上百姓祈禱水旱有

驗號鹿臺將軍元末李思齊築城戍此

渭橋鎮高陵縣志在縣南十五里長安志即李晟屯兵處

李晟墓通志在高陵縣西南十里裴度李忠武王神道碑公以貞元九年薨葬於高陵奉正原

巢閣通志在鄠縣西七里白樂天讀書處村名割耳莊有白沙諸泉匯為湖後長安逸民張光裕建閣馮從吾講學其上



石門精舍通志在藍田山石門寺王維嘗遊於此

藍橋通志在藍田縣東南五十里跨藍峪水上即尾生  
期女子不至抱柱而死及裴航得玉杵白娶雲英處通  
鑑唐中和元年將軍楊復光與朱溫戰敗之遂至藍橋  
而還胡三省注藍橋在藍田關南藍田縣志其橋久廢  
明有羽士鎔鐵為鍊飛空如虹行人便之重建藍橋碑  
記藍橋介商盤之間三秦阨塞豫楚要衝古有橋重修  
鐵鍊明季燬於賊

本朝康熙乙巳重修亘八丈六尺南岸即雞頭關北憑山  
峽壘石為馬頭增二鍊上翼闌干下支巨木

王維墓唐書王維傳維別墅在輞川終葬其西陳文燭  
遊輞川記藍田飛雲山前數里為清涼寺寺門西數百  
步有墳為維母博陵縣君崔氏及右丞墓

德宗崇陵通志在涇陽縣西北四十里嵯峨山唐書憲  
宗本紀永貞元年十月己酉葬神武聖文皇帝於崇陵  
宣宗貞陵通志在涇陽縣西北六十里仲山唐書懿宗

本紀咸通元年二月丙申葬聖武獻文孝皇帝於貞陵  
高祖獻陵通志在三原縣東北四十三里陪葬太妃公  
主諸王等二十五人唐書太宗本紀貞觀九年十月庚  
寅葬太武皇帝於獻陵

敬宗莊陵通志在三原縣東北三十里唐書文宗本紀  
太和元年七月癸酉葬睿武昭愍孝皇帝於莊陵

武宗端陵通志在三原縣東北三十里唐書宣宗本紀  
會昌六年八月壬申葬至道昭肅孝皇帝於端陵

于志寧墓神道碑麟德二年薨於東都安衆里之私第  
乾封元年十一月葬於雍州三原縣萬壽鄉清池里

臧懷恪墓通志在三原縣顏真卿神道碑開元十二年  
二月薨於鄴城官舍冬十月遷於京兆府三原縣北原

謹按顏真卿臧懷恪神道碑今  
在墓上旁為懷恪子希晏墓

半日村通志在渭南縣東五里新豐原太平寰宇記此  
村以山高蔽虧陽光僅及其半唐郎士元為渭南尉置  
別業於此

白居易故里通志在渭南縣東紫蘭村

王忠嗣墓渭南縣志在縣東南廣鄉原北麓

謹按王忠嗣神道碑

元載撰王縉書今移置縣西郭門外

白居易墓通志在渭南縣東北一十五里與弟行簡敏中三墓並列居易自撰墓志居易以會昌六年終於東都履道里私第春秋七十有五以某年月日葬於華州下邽縣臨津里北原附侍御僕射二先塋也

魏徵故里通志在富平縣境有左右鵝鴨池

美原鎮富平縣志在縣東北六十里即唐美原縣址當  
宜君白水蒲城富平四縣之交

中宗定陵通志在富平縣龍泉山唐書睿宗本紀景雲  
元年十一月己酉葬孝和皇帝於定陵

代宗元陵長安志在富平縣西北三十里檀山唐書德  
宗本紀大歷十四年十月己酉葬睿文孝武皇帝於元  
陵

順宗豐陵通志在富平縣東北三十里金甕山唐書憲

宗本紀元和元年七月壬寅葬至德大聖大安孝皇帝  
於豐陵

文宗章陵通志在富平縣天乳山唐書武宗本紀開成  
五年八月壬寅葬元聖昭獻孝皇帝於章陵

懿宗簡陵通志在富平縣虎頭山唐書僖宗本紀乾符  
元年二月甲午葬昭聖恭惠孝皇帝於簡陵

李光弼墓通志在富平縣西北三十里其弟光進墓亦  
近焉

太宗昭陵通志在醴泉縣東北四十里九峻山上唐書  
太宗本紀貞觀十一年二月丁巳營九峻山為陵賜功  
臣密戚陪塋地及秘器文獻通考貞觀十八年帝謂侍  
臣曰昔漢家皆先造山陵既達始終身復親見又省子  
孫經營不煩費人功古者因山為墳此誠便事九峻山  
孤聳迴絕因而旁鑿可置山陵又佐命功臣義深舟楫  
追念在昔何日忘之漢氏將相陪陵又給東園秘器篤  
終之義恩深意厚自今以後功臣密戚及德業佐時者



如有薨亡賜塋地一所及秘器使窆窆之時喪事無闕  
請陪陵塋者聽之以文武分為左右墳高四丈以下三  
丈以上若父祖陪陵子孫從塋者亦如之若官人陪塋  
則陵戶為之成墳凡諸陵皆置留守領甲士與陵令相  
知巡警左右兆域內禁人無得塋埋古墳則不毀之昭  
陵在京兆府醴泉縣因九巒層峯鑿山南深七十五步  
為元宮山旁架梁為棧道懸絕百仞繞山二百三十步  
始達元宮門頂上亦起游殿文德皇后元宮有五重石

門其門外於雙棧道上起舍宮人供養如平常及太宗山陵畢宮人亦依故事以閭立德奏乃止醴泉縣志唐書貞觀十年十一月庚寅葬文德皇后於昭陵十一年二月丁巳營九峻為陵則是陵未營而后先葬陵之營因后也陵有獻殿有後殿山巔亦有游殿今俱廢惟陵北存石屋三楹六駿列於左右及貞觀中擒服諸蕃君長頡利等十四人像琢石列之北司馬門內今皆不完其周垣重門甬路故跡猶存

臣謹按林伺昭陵石蹟攷九峻山在涇陽王橋鎮西地脉從崆峒來渭遠其前涇環其後而出其東岐梁西峙仲山嵯峨東障南則終南太乙天外列屏封內周迴百二十里陪塋諸王妃主勲舊蕃將東西班列碁布有序他如諸蕃君長擒伏歸降者刻石肖其狀貌深眼大鼻弓刀雜佩凡十四人拱立於享廟之前北闕之下石駿如生臣於乙未春三月以護送官兵入蜀迴途閱視涇陽龍洞渠道出醴泉得以周覽封

域瞻拜元宮及陪塋諸臣冢墓其土人所稱丞相冢

者魏徵墓也

在鳳凰山距昭陵十里

英國公李勣墓

在西屯村距昭陵二

十五里

衛國公李靖墓

在烟霞洞距昭陵二十五里

乃當日詔準漢

衛霍故事起塚象陰山鐵山以旌殊功土人呼為上

下三塚謂塚有三峯也其餘可攷者為蘭陵公主墓

中書令馬周墓薛國公阿史那忠墓

並在下古村距昭陵三十里

虞國公溫彥博墓

在烟霞洞距昭陵二十五里

申國公高士廉墓

國子祭酒孔穎達墓內侍將軍張阿難墓

並在上古村距昭陵

三十里 梁國公房元齡墓 在留東村 距昭陵二十五里 莒國公唐儉

墓

在大陽村 距昭陵四十五里

鄂國公尉遲恭墓

在老軍營 距昭陵三十五里

褒國公段志元墓 光祿卿姜遐墓

並在莊河村 距昭陵十五里

冠

軍將軍許洛仁墓 天策府記室薛收墓

並在新寨村 距昭陵三十里

里 乙速孤昭祐墓 乙速孤行儼墓

並在叱干村 距昭陵三十里 吏

部尚書張復允墓

在下巖峪村 距昭陵二十里

陸先妃墓 在西屯村 距昭陵

五里 凡二十有一餘俱茫昧難稽其塚有屹若崇

山如英衛二公者有巉削如懸崖絕壁者有頂平如

磐石者有下方上銳漸削如浮圖者其他如堂如壘或僅贖圮墻或僅存石獸或已蝕為田畝盡一日之力瞻拜不暇歸檢新舊唐書唐會要文獻通攷及志

乘圖籍所載互有不同唐書僅錄七十四人游景叔

昭陵圖百六十四人

苟好善醜泉縣志同

文獻通考百五十五

人惟會要所錄百六十七人此諸家較為詳具惟是當時各冢皆有穹碑夾以蒼松翠栢長楊巨槐下宮寢殿與表裏山河互相映帶一時君臣際會之隆生死

同歸之誼可稱甚盛慨自朱梁盜發而後再歷千年  
高臺已傾曲池已平不但塚墓無存即金石文字亦  
皆剝蝕無有今可錄者惟二十三碑而已因飭屬重  
加修飾並為清釐封域樹以宰木墓前古刻建以碑  
亭庶令樵牧牛羊知所禁避而先烈前徽得以貽諸  
永久云

肅宗建陵醴泉縣志在縣正北三十里武將山唐書代  
宗本紀廣德元年三月庚午葬文明武德大聖大宣孝

皇帝於建陵長安志建陵陪塋功臣一尚父汾陽郡王  
郭子儀

太元洞通志在華原東五里耀州志唐孫真人思邈隱  
居所也往時遊者持火可深入今崩碍不能行洞下有  
洗藥池二皆鑿石為者

柳公綽墓通志在耀州西北四十里其弟公權墓亦在  
焉

令狐德棻墓耀州志在州西北三里



令狐楚墓通志在耀州西北五里楚本州人唐憲宗時  
為相卒葬於此絢楚之子墓亦在焉

宋四馬務長安志在興平縣東南二十里一曰飛龍務  
次大馬務次小馬務次羊澤務地凡三百七十一頃南  
渡渭河慶曆中為營田尋罷之其後民占佃簿籍散亡  
不復歸於有司

相橋臨潼縣志在縣北六十里跨清水上宋相寇忠愍  
公準所建

呂通墓藍田縣志在縣北五里宋呂賁先汲郡人任比  
部郎中父通太常博士賁過藍田愛其山川風景遂葬  
通於藍田因家焉生大忠大防大鈞大臨舊有墓十五  
明成化十九年修

元蕭軒墓長安縣志蕭貞敏公墓在城南五十里子午  
鎮

楊恭懿墓通志在高陵縣南八里三陽寺前

郝忠定墓三原縣志在縣北二十里樓底原上忠定為

元五路軍民萬戶冀國公名華善巴圖爾中書左丞郝  
天挺父也

王寶寶墓通志在蓋屋縣西南十里寶寶歿於國事贈  
武德將軍蓋屋子

明馮從吾墓長安縣志馮恭定墓在城南

康橋臨潼縣志在縣北八十里明劉瑾陷李夢陽武功  
康海救之有義聲歸里時潼令為橋於漆水渡之因名  
呂柟墓馬理呂文簡公墓志公以嘉靖辛丑秋卒甲辰

七月葬於邑城之艮隅

王九思墓通志王檢討墓在鄆縣西北二里仁和里

龍橋通志在三原縣北門外兩城對峙中貫清水河河  
上有橋建隆四年清河泛漲橋圯明萬曆二十年邑人  
少保温純建大石橋三洞高八九丈袤十餘丈兩傍砌  
石欄南北各建石坊下有龍潭故名

王恕墓通志王端毅公墓在三原縣西北二里正德四  
年勅修

馬理墓通志在三原縣西北五里薛應旂馬光祿墓志  
嘉靖三十六年十月塋公於丁村塋

溫純墓通志在三原縣西北五里

柴家關盤屋縣志在縣南微東三百六十里自黑水谷  
歷桃李坪爛柴灣石牛灘逾柳葉河登峻逾險至老虎  
坡梨樹坪小王澗一堵牆越秦嶺六十里置關道通洋  
縣明正德十六年設巡司今裁

十八盤關盤屋縣志在縣西南入駱谷八十里十八盤

嶺上做前駱谷關故境稍為變置道通西鄉鳳縣明正德十六年設巡司及弓手先是山險人稀仇盜肆害設官後患息今裁

澇水橋通志在渭南縣西門外跨澇水上萬曆三十一年建甃石為梁廣二丈二尺高一丈五尺長二十丈下為門者十

孫丕揚墓通志在富平縣西二十里三里村

金鎖關同官縣志在縣北三十里神水峽有東西二路

一通延綏榆林一通寧夏甘肅道從石峽出絕壁千尺  
為榆塞秦關襟喉要地耀州志嘉靖三十年巡撫張珩  
議以鄜州南下省城金鎖關至為衝要宜築城戍守以  
防套寇突犯從之三十二年築關城置巡司今革設守  
備移入耀城內

本朝張勇墓王宏撰張襄壯侯墓志康熙二十三年卒二  
十四年葬於咸寧縣東南鳳栖原

關中勝蹟圖志卷八